

**'Kalau Tun M nak kritik biarlah berasas' - Najib
Astro Awani
Ogos 16, 2015
Dewi Nur Harasha Alias dan Khairunnisa Kasnoon,**

KEPALA BATAS: Presiden UMNO Datuk Seri Najib Tun Razak menyifatkan perbelanjaan RM10 juta untuk setiap pilihan raya di negara ini sebagai tidak munasabah.

Merujuk kepada kenyataan bekas perdana menteri, Tun Dr Mahathir Mohamad yang mendakwa hanya [membelanjakan kurang RM50 juta untuk kesemua lima Pilihan Raya Umum](#) (PRU) sepanjang mentadbir negara, Najib berkata setiap kenyataan yang diberikan haruslah boleh diterima akal.

"Kalau buat kenyataan tu mestilah munasabah, dia belanja RM10 juta sahaja.

"Saya dah congak deposit kerusi Parlimen dengan DUN (Dewan Undangan Negeri) perbelanjaan minimum RM41 juta, tidak termasuk lagi papan iklan.

"Kalau nak kritik mestilah ada asas, masuk akal malah ini tidak rasional langsung," katanya ketika merasmikan mesyuarat UMNO bahagian Kepala Batas di sini, hari ini.

Perdana Menteri berdepan kritikan kerana menerima derma dana politik RM2.6 bilion dalam akaun peribadinya sebelum PRU 13 pada 2013.

Dr Mahathir dalam entri blog beliau baru-baru ini menampar dakwaan perbelanjaan lebih RM2 bilion untuk satu pilihan raya sebagai tidak masuk akal.

Katanya, beliau hanya memerlukan kurang RM10 juta bagi setiap pilihan raya malah memenangi semuanya dengan lebih daripada dua pertiga majoriti.

Beliau juga memaklumkan membelanjakan lebih RM2 bilion untuk pilihan raya di Malaysia oleh mana-mana pihak adalah salah dan pada masa sama menyuarakan kebimbangan bahawa dana politik dalam jumlah yang terlalu tinggi itu mungkin membawa kepada penipuan undi dan rasuah.

© 2015 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-politik/kalau-tun-m-nak-kritik-biarlah-berasas-najib-70065>